



Aningaasaqarnermut Naalakkersuisoq

Aningaasaqarnermut Ataatsimiititaliap suliaq 01.31.06/10-00489 pillugu pingasunngornermi ulloq 25. august 2010-mi aalajangiineranik Naalakkersuisunut ilisimatitsineq.

Sulisunik utaqqiisaasumik najugaqartitsisarnermut aningaasartuutaanerulersunik akiliisitsisarneq.

Naalakkersuisut **inassutigaa**,

- Konto pingaarnermut 20.30.09-mut, Sulisunik utaqqiisaasumik najugaqartitsisarnermut tunngasumut, nutaamik oqaasertaliussassatut nr. 3-tut taassumalu nassuiaatitassatut missingiusiap 2010-mut ilassutitut aningaasaliissutitut inatsimmi ilanngunneqarnissaa akuerineqassasoq.

Aningaasaqarnermut Ataatsimiititaliap oqaaseqaatai

Oqaasertaliussap nutaap uuma Aningaasaqarnermut Ataatsimiititaliamit akuerineqarnissaa Naalakkersuisut suliami matumani qinnutigaa:

"Konto pingaarneq 20.30.09-mut, Sulisunik utaqqiisaasumik najugaqartitsisarneq, oqaasertaliussat

Nr. 3.

Naalakkersuisut piginnaatinneqarput utaqqiisaasumik ineqartitsinermut aningaasartuutitut akiliutissat akilersinniarneqarnerannut atatillugu ingerlatsinermut kontonit tamanit konto pingaarneq 20.30.09-mut, Sulisunik utaqqiisaasumik najugaqartitsisarneq, nuussuisinnaanissaannut.

Konto pingaarneq 20.30.09-mut, Sulisunik utaqqiisaasumik najugaqartitsisarneq, oqaasertaliussanut nassuiaatit

Nr. 3.

Utaqqiisaasumik ineqartitsisarnerup allaffissornikkut aqunneqarnera ulloq 1. januar 2010-miit atuutilersumik Aningaasaqarnermut Sulisoqarnermullu Aqutsisoqarfimmuteqiterneqarpoq.

Oqaasertaliussatigut ukunuuna siunertaavoq ASA-p inatsisitigut tunngavissinneqarnissaa Naalakkersuisoqarfinnit, Aqutsisoqarfinnit taakkulu ataanni allaffissornikkut immikkoortortaqarfinnit ingerlaavartumik akiliutissanik akileeqqusisarnissaminut aningaasartuutunik Namminersorlutik Oqartussat utaqqiisaasumik ineqartitsinermut ataatsimut atugassanngortitaannut atasunik.

Oqaasertaliussat makku nutaajupput.

Aningaasaqarnermut Ataatsimiititaliamit ulloq xx-yy-2010-mi akuersissutigineqarpoq. Suliap normua 10-xxx.”

Utaqqiisaasumik ineqartitsinerumut tunngasumik iliuitsit pillugit Aningaasaqarnermut Ataatsimiititaliap apeqqutaanut arlalinnut Naalakkersuisut akissutaannut atatillugu Naalakkersuisut qinnuteqaataat ataatsimiititaliamit suliarineqarpoq (Tak. suliaq nr. 01.31.29-198, allakkat 4. august 2010-mi ullulerneqarsimapput ullorlu 18. august 2010-mi tiguneqarlutik)

Kontomi pingaarnermi 20.30.09-mi akuersissutigineqanngitsumik atuinerussuteqarneq?

Ulloq 4. juni 2010-mi allagaqarlutik Naalakkersuisut Aningaasaqarnermut Ataatsimiititaliamut ilisimatitsissutigaat kontomi pingaarnermi 20.30.09-mi juni 2010-mi atuinerussuteqartoqareersimasoq. Tamanna aningaasaliissutinik qaangiisimanertut Aningaasaqarnermut Ataatsimiititaliamit paasineqartariaqarmat missingersuusiornermut inatsimmi aalajangersakkat naapertorlugit sooq piffissaagallartillugu ilassutitut aningaasaliissuteqarnissamik qinnuteqartoqarsimannginnera nassuiaatigeqqullugu Naalakkersuisunut ilaasortaq Aningaasaqarnermut Ataatsimiititaliamit qinnuigineqarpoq. Maannalu Naalakkersuisut 4. august 2010-mi akissutaanni allassimavoq Aningaasaqarnermut Ataatsimiititaliamut ilisimatitsissuteqarnerup nalaani konto pingaarnermi 20.30.09-mi, Sulisunik utaqqiisaasumik najugaqartitsisarnermut tunngasumi, sippuisoqarsimanngitsoq. Suliaq pillugu allakkat kingulliit naapertorlugit ulloq 26. juli 2010-mi suli sippuisoqarsimanngilaq. Allakkat 4. junimeersut paatsoorneqarsinnaasumik oqaasertalersugaanerat Naalakkersuisut pissusissaatut ajuusaarutigaa.

1. Kontomi pingaarnermi 20.30.09 atuinerup 4. juni 2010-mi, 26. juli 2010-mi aammalu 17. august 2010-mi killiffianut takussutissiaq ulluni taaneqartuni aningaasaliissutit sipporneqarsimannginnerannut uppernarsaatitut Aningaasaqarnermut Ataatsimiititaliamit qinnutigineqarpoq.
2. Konto pingaarnermi 20.30.09-mi aningaasaliissutit 2010-mi sipporneqarnissaat naatsorsuutigineqarpa?

Sulisunut utaqqiisaasumik ineqartitsinerup qitiusumit aqunneqalernera naapertuuppa?

Namminersorlutik Oqartussat allaffissornikkut aningaasartuutaasa killilersimaarneqarnissaat siunertaralugu sulisunut utaqqiisaasumik ineqartitsineq 1. januar 2010-mi qitiusumit aqutassanngortinneqarpoq. Taamatut qitiusumit aqutsilerneq sipaaruteqarnermik kinguneqarsimanersoq imaluunniit siunissami sipaarutaalerumaarnersoq suli paasinarsinngilaq. Aningaasaqarnermulli Ataatsimiititaliamit maanna oqaatigineqartariaqarpoq Naalakkersuisut ataatsimiititaliap apeqqutaanut nr. 8-mut akissutaat naapertorlugi suliasaqarfik naapertuuttumik missingersuusiorfigineqarsimanngimmat, tamannalu Aningaasaqarnermut Ataatsimiititaliap apeqqutaanut arlalinnut Naalakkersuisut akissutaasigut ersersinneqarpoq. Taamaattumillu qitiusumit aqutassanngortitsineq naammattumik piareersarluagaasimanersoq, tassungalu ilanngullugu aningaasarnikkut tunngavissiissutaasut *piviusorsiortuusimanersut* ataatsimiititaliamit isumaliutigineqartariaqarpoq. Tamanna ukiumut aningaasanut inatsiseqarfiusumut matumunnga aammalu 2011-imi aningaasanut inatsisissatut siunnersuummut tunngatillugu pingaaruteqarpoq.

3. Qitiusumit aqutsilernermi sipaaruteqarnikkut iluanaarutissatut naatsorsuutigineqartut pissarsiarineqarsinnaaqullugit suliniutit allat sorpiaat atuutsinneqalersussatut naatsorsuutigineqarpat?
4. Sulisunut utaqqiisaasumik ineqartitsinerup siunissami aqutsivigineqarnernissaani iluaqutaasinnaasunik aqutsisoqarfinni allani suliaasaqarfinnik allanik qitiusumit aqutsivigineqartussanngortinneqarsimasunik sanilliunneqarsinnaasunik misilittagaqartoqarpa?

Kaajallaasitamik malinninnginneq

Isummernissamut tunngavissiaq Naalakkersuisut ataatsimiittarneri il.il. pillugit Naalakkersuisut kaajallaasitaat naapertorlugu suliarineqarsimanngitsoq apeqqummut nr. 14-mut Naalakkersuisut akissutaanni allassimavoq, tassa isummernissamut tunngavissiaq K-gruppitut taaguutilimmit suliarineqarsimannгимmat. Tamatuma saniatigut Aningaasaqarnermut Ataatsimiititaliap ilassutigissavaa kikkut tusarniarneqarsimanerisa nalunaarneqarnissaa pillugu kaajallaasitami § 6, imm. 2, nr. 6 aamma malinneqarsimannгимmat.

5. Kaajallaasitap saneqquneqarnissaa aalajangersimasumik tunngavilersugaasumillu suliami aalajangersimasumi matumani akuersissutigineqarsimava, taamaanngippallu Naalakkersuisut aammalu Aningaasaqarnermut Ataatsimiititaliap isummernissaannut tunngavissiat pitsaassutsikkut qulakkeerivigineqaqqullugit kaajallaasitaq sulianillu ingerlatsisarnermi maleruagassat allat tamakkiisumik malinneqarnissaat Naalakkersuisut qanoq ilillutik qulakkiissavaat?

Nutaatut oqaasertaliussassatut siunnersuutigineqartoq

Aningaasaqarnermut Ataatsimiititaliap apeqqutaa nr. 3 tunngavigalugu paasineqarpoq sulisunut utaqqiisaasumik ineqartitsinermut aningaasartuutit Naalakkersuisoqarfinnit akilersinneqarnissaannut inatsisitigut tunngavissiaq Naalakkersuisut amigaatigigaat, tamannalu tunngavigalugu oqaasertaliussa siuliani issuarneqartoq Naalakkersuisunit siunnersuutigineqarpoq. Naak Aningaasaqarnermut Naalakkersuisup Naalakkersuisut isummernissannut tunngavissiami 3. junimeersumi, Aningaasaqarnermut Ataatsimiititaliamut ulloq 4. juni ingerlateqqinneqartumi, taamatut akiliisitsinissaq Naalakkersuisunut inassutigigaluaraa. Isummernissamut tunngavissiaq Naalakkersuisut ataatsimiittarnerat il.il. pillugit Naalakkersuisut kaajallaasitaat naapertorlugu suliarineqarsimagaluaruni ilusiligaanermi imarisamigullu taama amigaateqarnera pinngitsoorneqarsimassagaluartoq ilimagisariaqarpoq. Tassunga atatillugu apeqqut siuliani allassimasoq innersuussutigineqarpoq.

Pissutsit qanorluunniit ikkaluarpata Naalakkersuisut isummernissaannut tunngavissiami 3. junimeersumi taaneqartutut annertutigisumik ukiup imaalereernerani nuussinissaq Aningaasaqarnermut Ataatsimiititaliamit naapertuutinngilluinnartutut isigineqarpoq. Taamatut nuussinerit missingersuutit suliaasatullu anguniakkat atuuttut iluini ingerlanneqarsinnaanngitsut, tamannalu naalakkersuisoqarfiit pineqartut ilassutitut aningaasaliissutinik qinnueqarsinnaanerannik nassataqarsinnaasoq naalakkersuisoqarfiit arlallit majimili oqaatigigaat Naalakkersuisut allakkiaanni kingullermi allassimasoq ataatsimiititaliap maluginiarpaa.

Tamatuma saniatigut sulisunik utaqqiisaasumik ineqartitsinermut aningaasartuutit naalakkersuisoqarfinnit ataasiakkaanit tamakkiisumik matussuserneqartarnissaat Aningaasaqarnermut Sulisoqarnermullu Aqutsisoqarfiup (ASA) ingerlaavartumik

piumasaqaatigiinnartassappagu sulisunik utaqqiisaasumik ineqartitsisarnerup qitiusumit aqunneqalerneratigut sipaaruteqarnissamik anguniagaq isumaarutissasoq oqaatigineqartariaqarpoq. Allaffissornermik ingerlatsiviit ataasiakkaat siunnersuutigineqartut aningaasartuutaanerussutissanik annertuunik akiliinissamik peqquneqaannartarsinnaappata sulisunut utaqqiisaasumik ineqartitsinermi atukkanut malinnaajumallutik naalakkersuisoqarfiit namminneq naatsorsuusiortariaqalissapput, taamaaliornikkullu qitiusumit aqutsilernermit allaffissornikkut sipaarutissat killeqalinnikkunik annaaneqassallutik. Kiisalu Inuusutissarsiornermut Suliffeqarnermullu Naalakkersuisoqarfimmit aammalu Kultureqarnermut, Ilinniartitaanerumut, Ilisimatusarnermut Ilageeqarnermullu Naalakkersuisoqarfimmit tusarniaanermut akissutit naapertorlugit taamatut nuussinerit aningaasanut inatsimmi Inatsisartut aningaasaqarnikkut tulleribiaarillutik pingaarnersuiunerannik allannguisinnaanerit annertuumik ajornartorsiutitaqartutut isigineqartariaqarpoq. Kiisalu taama ilusiliineq suliassaqarfimmi sulisunik aningaasanillu akisussaassuseqartumik ASA-p aqutsinissaanut siuarsaataangilaq. Sulisunullu utaqqiisaasumik ineqartitsinerup qitiusumit aqunneqalerneru suliniutaammat nutaaq unammillernartunik immikkut ittunik imaqartoq oqaasertaliussaq ataatsimiititaliamit - eqqarsarnartoqartinneqaraluarluni - akuerineqarsinnaavoq. Oqaasertaliussarli taamaattoq 2011-mi aningaasanut inatsimmut ilanngunneqassanngitsoq ataatsimiititaliaq isumaqarpoq. Taamaalillunilu 2011 aallarnerfigalugu sulisunut utaqqiisaasumik ineqartitsinermik aqutsinini ASA-p - immikkoortortat allat assigalugit – aningaasanut inatsimmi aningaasatigut atugassarititaasut iluini isumagisariaqassavaa aammalu 2011-p ingerlanerani killissarititat taakku malinneqarsinnaanngitsut paasineqassagaluarpat sooq taakku eqquutsinneqarsinnaannginnerisut ersarissumik nassuiaateqarfigisariaqassallugu.

Kiisalu oqaasertaliussap immikkoortua kingulleq ersarinngitsumik oqaasertalersugaasimavoq, taannalu oqaasertaliussap 2010-mi ilassutitut aningaasaliissutitut inatsimmi naqinneqannginnerani iluarsineqarsimassasoq **tunnqavissaatinneqarpoq.**

6. Aningaasaqarnermut Ataatsimiititaliap siuliani allassimasutut naliliineranik malinnikkumallutik Naalakkersuisut nalunaaruteqarnissaat naatsorsuutigineqarpoq.

Pissutsit piffissamut tunnqasut

Ataatsimiititaliap 25. juni apeqqutaanut Naalakkersuisut akissutaat sapaatip akunnerinik arlalinnik kingusinaartumik tiguneqarpoq. Suliassat ilisimatitsissutilluunniit ataatsimiititaliamit suliarineqartussat pisarnermit sukkanerusumik aammalu ataatsimiititaliap ataatsimiinnissaanut pilersaarut nalunaarutigineqareersoq mianeriniarnerullugu nassiunneqartarnissaat Aningaasaqarnermut Ataatsimiititaliap ukiut ingerlaneranni akuttunngitsumik eqqumaffigeqqusarsimavaa. Naalakkersuisut siunissami suliassanik peqqissaarnerusumik suliarinnittarnissaat piffissaagallartillugulu Aningaasaqarnermut Ataatsimiititaliamut nassiussisarnissaat Aningaasaqarnermut Ataatsimiititaliamit naatsorsuutigineqarpoq.

Aningaasaqarnermut Ataatsimiititaliap aalajangiinera

Aalajangiinerup matuma tiganeranit **ullut 14-it qaangiutsinnagit** apeqqutit siuliani allassimasut Naalakkersuisut akissuteqarfigalugillu atortussanik tassunga attuumassuteqartunik nassiussinissaat kiisalu 2011-mi aningaasanut inatsisissatut siunnersuummi taama oqaasertaliussinissaq pillugu siunnersuummik saqqummiussisoqannginnissaanik uppersaateqarnissaat **tunnqavissaatillugu** Naalakkersuisut inassuteqaataat Aningaasaqarnermut Ataatsimiititaliamit **akuerineqarput.**

Naalakkersuisut akissuteqaataat kalaallisut danskisullu kiisalu nuutinnera qarasaasiakkut

uunga nassiunneqassasoq qinnutigineqarpoq: nch@ina.gl.

Aningaasaqarnermut Ataatsimiititaliaq sinnerlugu

Niels Thomsen

Aningaasaqarnermut Ataatsimiititaliap siulittaasuata tullia

Ilanngussaq: Inissiaagallartunik aqutsinermit atatillugu suliniutit pillugit Naalakkersuisut 4. august 2010-mi allagaat